

附錄：謝鴻軒教授撰壽序兩篇

蔣夫人華誕頌辭並序

謝 鴻 軒

和風拂地。召煙景於青陽。淑氣浮空。映輝光於紫闥。百花獻瑞。設錦帨而共慶良辰。四海回春。仰慈雲而賡歌復旦。粵以

中華民國七十有四年四月一日。歲次第二乙丑花朝。欣值

夫人華誕。徽音逾永。坤德邇隆。煥寶婺於碧霄。頌閼宮之黃髮。河洲雅詠。周南王化之基。嶺表開祥。天下母儀之重。懋功懋賞。佐盛業而匡時。矢勇矢勤。秉聖言而濟世。高瞻遠矚。既首倡於航空。易俗移風。更心殫於婦運。宏恩廣被。使軍眷無凍餒之虞。大義振揚。示國際以視聽之正。益以痼瘵在抱。康濟爲懷。沛澤惠及童蒙。復健瘳其疾疾。類皆化沾時雨。愛沐春暉。羅濟濟之師儒。列宮牆而弦誦。育莘莘之學子。敷桃李而芬芳。至若俊發天機。昌明文運。吐珠璣於翰藻。彤管凝輝。引泉石於畫圖。瑤箋寫韻。鳴心林鳥。時聞長樂之歌。奪目園花。慣伴忘憂之草。回溯與開羅之會。宣言還合浦之珠。用能丕建三臺。奠復興之基地。重光九域。收錦繡之山河。鍊石補天。載誦女媧之德。奉桃獻壽。又開王母之筵。法統縣延。華夏高呼以萬歲。慈闈頤養。萱齡永晉於千秋。謹製頌言。藉彰懿範。辭曰。

坤厚含章。元吉黃裳。居敬立義。內直外方。安貞達道。後順得常。積善餘慶。應地無疆。其一

皇矣文王。配德孔莊。學兼體用。質稟溫良。勤侔太姒。勞訓敬姜。蘋蘩敦禮。慈孝徵祥。其二

履和吐馨。範著明廷。或佐王事。一秉聖經。恩周海宇。勳紀鼎銘。博施濟衆。

芘蔭生靈。其三

始倡空航。鞏固國防。八年抗戰。萬里迴翔。埃京集會。蓬島重光。田單復土。

在莒毋忘。其四

維護性天。平等宜先。導之婦運。張以女權。眷村廣建。愛澤長縣。老安少懷。

古訓曰然。其五

靜則必仁。與物爲春。煙巒萬疊。筆力千鈞。蒼枝勁健。翠蓋常新。通靈致雨。

妙墨傳神。其六

聖善母儀。大雅扶持。重洋怡養。上壽期頤。遐宣漢化。默御天機。喁喁向慕。

翹首慈暉。其七

創校嘉猷。瑞藹嶺頭。菁莪茁茂。桃李花稠。弦歌不輟。禱祝靡休。樹人興國。

萬歲千秋。其八。

私立華興高級中學校長兼華興育幼院

院長陳紀彝率全體教職員學生拜祝

繁昌謝鴻軒恭譔並書

中華民國七十四年四月一日重逢乙丑仲春月十二日穀旦

廬江張宗良先生八秩華誕暨德配

丑夫人稀齡悅辰雙壽序

謝 鴻 軒

卿雲紛郁。九天肇六甲之端。化雨露濡。百載逢雙春之節。方衣冠之萃集。國會宏開。正桃李之芳舒。公門攀仰。長庚星煥。北辰與南極交輝。閬苑客盈。西母偕東王竝壽。粵以

中華民國七十有三年四月七日。歲次第二甲子季春月初七日。欣值

國民大會代表、考試院副院長張公宗良先生八秩華誕。兼爲賢德配丑夫人志琦稀齡悅辰。黃菊斜簪。青松對映。鸞儔比翼。同添海上之籌。鴻案齊眉。迭奏房中之樂。爰彰盛德。藉播清芬。

公迺華夏名流。舒廬望族。衍三張之餘緒。綜八皖之雄奇。揚子奔騰。唱大江之東去。天都峻極。羨仙鶴之南飛。稟河嶽之精靈。以詩書爲枕藉。資忠履孝。由義居仁。世德相承。貞觀信美。他山可借。攻錯有成。國立中央大學卒業後。旋赴英國倫敦大學深造。榮獲博士學位。含英咀華。明體達用。博通經史。抱匡時濟世之才。貫徹中西。振潤古雕今之業。慨夫鯨波鼎沸。蜀道都遷。日下人歸。天邊路遠。向長安而西望。念迢遞之關山。效老杜之北征。激高昂之士氣。于時政治部部長陳公辭修。延爲記室。繼充秘書處處長。調中央訓練團辦公廳副主任。陳琳阮瑀。緣書記以起家。應陽劉楨。參戎機而入幕。舉慶孫爲上佐。命議如流。譬李彥之公勤。斷決無滯。

民國二十九年。出任安徽省政府委員兼省幹部訓練團教育長。道政齊禮。培眞幹之材。登明選公。琢循良之器。化民易俗。教戰圖強。嗣以省政府委員兼皖南行署主任、暨保安司令皖南行營主任。時則戰況方酣。軍情甚急。巡迴敵艦。何殊鐵鎖沈江。狼狽姦徒。直是萑苻徧野。益以匪共爲孽。豪猾恣橫。遂毅然除暴安良。懲一警百。執如山之法。吏不敢欺。廣布澤之雲。人皆懷惠。誅冀州之盜。憚朱穆之權威。弭潢池之兵。感龔遂之德化。矧夫利物以和義。厚生以養民。興廉讓之風。奏耻格之效。故能著連城之治績。保半壁之休和者也。

迫島寇高豎降旛。省府撤銷行署。復以省政府委員兼建設廳廳長。竝兼三民主義青年團安徽支團主任。復員建省。詢屬百廢待興。繼往開來。厥奉三民主義。導江淮兒女。作黨國之英髦。爲桑梓敬恭。謀鄉邦之福祉。

行憲以還。膺選國民大會代表。三度蟬聯主席團主席。宜勤議席。恪守憲章。頻獻討謨。縣千秋之法統。賡歌起喜。證四海之民心。

至若 公之樂育菁莪也。受聘國防研究院講座。主講大英國協。襄贊張其昀曉峯先生創辦中國文化學院。首任院長。接長國立臺灣師範大學。歲時久歷。建樹尤多。揆公學究天人。士欽鴻博。游楊負笈。願立雪於程門。房杜植材。悉希風於孔室。韓昌黎傳道授業。肆外閭中。范文正明德新民。先憂後樂。

公之迴翔廊廟也。嘗任中國國民黨中央委員、國家安全會議副秘書長。現任中國國民黨中央評議委員、光復大陸設計研究委員會委員、考試院副院長等職。忠規讜論。元戎寄若股肱。宏略碩謀。中邦安如磐石。躋樞垣而定策。輔棘院以掄才。甄拔賢良。山濤題爲啓事。銓衡公正。韋陟長於鑑裁。雁塔標名。搜得讀書種子。鳳池繫望。彌多接脚門生。

維 公氣秉中和。操持高潔。挺松筠之勁質。直榦百尋。韞珪璧之純姿。冰心一片。躬行古道。修己所以安人。家靡餘財。惜福斯能納祐。由是杖朝洽慶。伉儷偕歡。舞綵爭娛。芝蘭競秀。鵬程丕展。莫辭滄海之遙。龍種懷歸。依戀白沙之里。鶯飛三月。夢憶江南。鶴鳴九臬。聲聞天下。假文章於大塊。無待雕鐫。度甲子之雙周。允符禱祝。椿榮萱茂。足徵仙島之長春。日升月恒。竚看神州之復旦。謹序。

繁昌謝鴻軒敬譔

至德謝宗安敬書

中華民國七十有三年四月七日歲在閏逢困敦律中姑洗季春之月初七日

穀旦